

Igor Kalaba iz “Centra za životnu sredinu” smatra da BiH ima zastarjele i prljave izvore energije, što znači da se nalazi na prekretnici planiranja velikih dugoročnih investicija u energetske sektor.

On je to kazao danas u Sarajevu povodom prezentacije novog modela za planiranje dekarbonizacije energetike u BiH. Prezentacija je bazirana na osnovu energetskog modela kreiranog u sklopu projekta “Strategija za održivu energiju jugoistočne Evrope” koji uključuje BiH, Albaniju, Hrvatsku, Kosovo, Crnu Goru, Makedoniju i Srbiju.

Kalaba je pojasnio da je namjera “Centra za životnu sredinu” doprinijeti diskusiji o energetske sistemima u ovom dijelu Evrope te pokazati da je moguć prelazak na održive, obnovljive izvore energije.

Dodao je da projekt traje već dvije i po godine, a trajat će još godinu i po, te će novi model dekarbonizacije biti dostupan svima na internetu, od stručnjaka do ostalih zainteresiranih. Menadžer za kvalitet i ekologiju Tvornice cementa Kakanj Almir Bajtarević kazao je da će BiH ubuduće imati obavezu da smanji emisije ugljendioksida (CO₂) jer se približava ulasku u Evropsku uniju (EU).

U cementnoj industriji, kako je rekao, jedan od načina da se to postigne jest korištenje otpada kao goriva, umjesto uglja, nafte ili plina, jer emisija CO₂, podsjetio je, nastaje prvenstveno sagorijevanjem fosilnih goriva.

Šef Delegacije EU u BiH ambasador Lars-Gunnar Wigemark kazao je da će EU nastojati stvoriti ekonomiju s niskom emisijom ugljika, kako bi učinili da ekonomski prostor u Evropi bude manje ovisan o energiji i da povoljno utiče na klimatske promjene.

Zbog toga je, ističe, potrebno smanjiti potrošnju energije, i s tim u vezi istakao je da su se evropski lideri usaglasili da do 2030. smanje potrošnju gasa za bar 40 posto, u poređenju s potrošnjom u 1990. godini.

Wigemark je mišljenja da se pitanje potrošnje energije u BiH ne bi trebalo posmatrati izolovano od ostalih razvoja događaja, već kao ključni dio njene integracije u EU.

Naglasio je da je ovo područje gdje se dosta može uraditi u pozitivnom smislu, jer, kako je rekao, BiH je jako bogata energijom, ali se, nažalost, ne koristi efikasno, kao, uostalom, i u drugim zemljama regije.

Izvor: Agencije